

# FANTIK KOANT

EUR ZON GOZ — Gwisket e nevez

(*Goulen an tōn digant potred Kerdrel e Lannilis.*)



H

Debonjour Fantik koant,  
Na c'hui zo kaer ha drant,  
Ha lemm ho taoulagad :  
Ho kuelet a ra vad !  
Fantik, ha daoust ha c'hui  
O peuz c'hoant dimezi ?

Den yaouank, 'ti va mamm  
A veac'h ma zeuz eun tamm,  
Nag arc'hant da brena ;  
An dra-ze ar goassa !  
Ne ven ket gwest hirio  
Da baea va friko !

3

Eur friko, Fantik koant,  
A goust eun tam arc'hant ;  
Mez eur plac'h fur ha paour  
A dal eur berniad aour !  
Me meuz aour hag arc'hant  
Leun-chek eur vativant !

4

Den yaouank, en va zi  
N'euz ken skudellou pri,  
Eur vasin, eur bodez,  
Eur podik da glask lez,  
Eun daol, eun tabore :  
Bet digant eur c'herne !

5

Gwelet a raan, plac'hik  
Ne doc'h ket pinvidik  
Mez o komzou gwirion  
O kened, o kalon  
A lavar d'in n'euz ket  
Ho seurt-c'hui dre ar bed !

6

Bez ameuz c'hoaz ouspenn  
Diou gos-kastoloren  
Hag eur billik nevez  
Evit ober krampoez,  
Eun trebest, eur guele,  
Setu va oll leve !

7

Pell zo emaoun er vro  
O redek tro var dro  
Evit klask eur pried :  
Ne gavan hini bet  
A ve d'am zantimant  
Nemedoc'h, Fantik koant.

# Sôn ar C'hafe



I

Oh ! me gav mad eul loum kafe — laïtou  
Oh ! me gav mad eul loum kafe,  
Mé 'm bevez kafe 'n va guele.

## Diskan

Laitou,  
Laitou, laïla,  
O laïtou, laïtou, lanla.

2

Pa gân ar c'hillek en he c'hlud :  
« Allo, 'mon-me, kafe d'an dud ! »

3

Diouz ar mintin pa zav Mar-Jeann :  
« Allo ! ar c'hafe var an tân ! »

4

Var dro nav heur, da c'hortozen :  
« Allo ! ar c'hafe er volen ! »

5

Vardro kreiz-deiz, da c'houdé lein,  
Kafe d'in-me, ha pa ve brein !

6

Var dro peder heur, va zud keiz,  
Pa vez ket 'gafe... hir an deiz !

7

Da c'houdé koân, evit kousket,  
Netra ne dâl kafe koueffet !

8

Grid eveldon, goazed, merc'hed,  
Hag e krenvoc'h gant ar yec'hed.

9

Ar c'hafe zo eul louzou mad [troad.  
D'ar c'hov, d'ar penn, d'an dourn, d'an

10

Ar c'hafe zo eul louzou c'huek  
Da zigeri an estomek.

11

Ar c'hafe zo eul louzou yac'h  
Da denerât kalon ar plac'h.

12

Kounta vez great eo ar merc'hed  
A ev muia kafe kueffet.

13

Neuze, merc'hed, arabat eo  
Sarmoun da Yann pa vez mezo !

14

Echu va sòn, ha ma plij deoc'h,  
Me c'houlen kafe diganeoc'h.

P. Tr.